

欽
定
全
唐
文

欽定全唐文卷五十一目錄

新文藝出版社藏書

德宗 二

贈段秀實太尉詔

宥李懷光宣諭河中將士詔

贈郭雄同州刺史詔

諭李懷光詔

討李希烈詔

權停來年郊廟詔

贈顏真卿司徒詔

給百姓耕牛詔

許百姓開採瑟瑟詔

招撫河中將士詔

授韋執誼等官詔

祀五方配帝不稱臣詔

賜百官錢詔

歲歉罷朝賀詔

褒涇陽令韋滌詔

加恩被擒將士詔

拜風師雨師詔

命舉選人習開元禮詔

增置金吾十六衛料錢糧課詔

以吐蕃入寇避正殿詔

三節賜宴賞錢詔

令常參官陳奏利害詔

張茂宗尚公主詔

欽定全唐文卷五十一

德宗 二

贈段秀實太尉詔

見危致命之謂忠臨義有勇之謂烈惟爾克勵臣節不憚
殺身惟朕式嘉乃勲懋昭大典曰台不德罔克若天邁茲
殷憂變起都邑惟爾卿士噉然靡依逼畏所加溜澠共混
故開府儀同三司檢校禮部尚書司農卿上柱國張掖郡
王段秀實操行嶽立忠厚精至義形於色勇必有仁頃者
常鎮涇原克著威惠叛卒知訓咨爾以誠賊泚藏姦欺爾

以詐守人臣之大節洞元惡之深情端委國門挺身白刃
誓碎凶渠之首以敵君父之讎視死如歸履虎致陴噫天
未悔禍事乖垂成雄風壯圖振駭羣盜昔王蠋守死以全
節周顓正色而抗詞惟我信臣無愧前哲聲聞寰宇義冠
古今足以激勵人倫光昭史冊不有殊等之賞孰表非常
之功爰議疇庸特超簡限著之甲令樹此風聲可贈太尉
諡曰忠烈宣行史官仍賜實封五百戶莊宅各一區長子
與三品正員官諸子並與五品正員官仍廢朝三日收京
城之後以禮葬祭旌表門閭朕承天子人臨馭億兆一夫

不獲則曰時予之辜況誠信不達屢致寇戎使抱義之臣陷於凶逆有臨危致命歿而愈彰有因事成功權以合道苟利社稷存亡一致酬報之典豈限常員並委所司訪其事蹟續具條奏當加褒異錫其井賦圖形雲閣書功鼎彝以彰我有服節死誼之臣傳於不朽

宥李懷光宣諭河中將士詔

聞者變興京邑朕播越奉天李懷光仗義帥師自遠赴難逆黨奔潰危城解圍錄其茂勲嘉其明節所以任崇元帥位極上台而祿滿盈慮迴惑信受間諜自生疑貳朕以匡

復大計藉其成功曉諭將相禮待殊厚而野心不革狂顧
逾甚欺誘羣帥襲奪衆軍誣陷信臣拒違詔命與朱泚結
固通使往返放肆凶威彰示狂逆務爲劫脅迅發醜言萬
情失圖諸將咸憤所以重茲巡狩越次梁岷違奉宗祧淪
汙士庶撫心自咎良增愧歎寔由朕格物之誠不至知臣
之鑒不精永惟此軍功著王室安祿山之作亂肅宗以朔
方之衆復區夏僕固懷恩之縱逆代宗用朔方之師靜關
塞洎朕涉此多難露處奉天內則擐甲登陴外則厯險赴
難寒不挾纊夜不釋戈邦國不傾寇仇斯屏竭誠致命力

衆一心朕方期收復皇都策勲命賞永同休戚大報功勞
豈圖餘孽未平叛臣連禍臨制將士莫由自申憤激於中
誓不同惡每一念此惻然疚心猶以懷光舊勲務於容貸
其副元帥太尉中書令河中尹朔方等諸道節度觀察等
使宜並罷免改授太子太保其所管兵馬委本軍自舉一
人功高望重者便宜統領速具奏聞當授旌旄以從人欲
應朔方及諸軍在行營并奉天兵士春衣等時方暄熱並
未支給每想暴露豈遑安居今江淮轉運般次即至續當
支遣朕知朔方將士忠順惜朔方將士功名所以殷勤再

三視遠如邇斯言必信毋自棄焉

贈郭雄同州刺史詔

朕越自邦畿至於梁漢而庶尹卿士各勤其職雄以鋒刃之下倉卒遇害親戚阻絕孤魂何依豈不以予一人不德而使子大夫罹其禍也永言憫惻增軫於懷爰申寵贈俾如常典

諭李懷光詔

李懷光往因職任頗著幹能朕嗣位之初首加拔擢託爲心膂授以旌旄頃歲河朔不寧令往征討任兼將相恩極

邱山及朱泚猖狂誘姦作亂擾動京邑逼迫奉天懷光率
領全軍奔赴國難凶逆逃遁宗社再寧保安朕躬實有所
賴委元帥河中府之權兼太尉中書令之秩廣增戶食賞
及宗親人臣之盛莫與爲比豈朕於懷光不盡豈朕報懷
光不崇京邑未收嫌釁已構被朱泚潛使姦人說誘又受
張佖等惑亂之辭曾不覺知自生疑阻遂與元惡通和往
來朕志在推誠事皆掩覆禮遇轉厚委任轉深都不悛心
凶惡日甚勅書慰問將士懷光並不令宣三軍咸欲收城
懷光並不令出自云已共朱泚定約不能更事國家兼朱

泚所遣來人令見宣慰勅使公言迫脅無復君臣朕以眇身獲承鴻業務全大計遷幸山南蒼黃之間備厯危險賴朔方等軍將士保守忠義恥陷惡名不謀同辭誓守臣節懷光知將士之意不可改移徑往河中偷安朝夕據有罪迹情實難原然以奉天解圍嘗著勲烈昨又遣男瓘等謝罪懇請束身歸朝朕憫其改過之誠念其赴難之效以功贖罪務在優容令給事中兼御史大夫孔巢父齋先授懷光太子太保勅牒河中宣慰訖三日內便與懷光同赴上都所在保護不得邀截驚動違者按以軍令仍許懷光將

百人已下隨身防援如欲使令家口同行亦聽懷光若至
闕庭必保全終始厚恩寵命待之如初仍賜實封五百戶
子孫承襲代代無絕信如皦日朕不食言朔方軍素推忠
義國家每有危難未嘗不立大功子儀兩收京城皆是此
軍之力昨又遠從河北來赴奉天逆賊畏威望風奔遁眷
言殊績朕豈暫忘其事將士各竭忠志叶心勦力橫遭迫
脅無路自申每一念之痛心自咎比者君臣阻隔只爲懷
光一人今懷光自請入朝猶捨其罪況諸將士並是功臣
各宜坦然更勿憂慮所有官爵實封並賜名定難功臣一

切如故仍準元勅超五資與改轉

討李希烈詔

朕臨御萬方失於君道兵革不息於今五年閔衆庶之勞
悔征伐之事而李希烈蔑義棄德反道虐人朕哀彼生靈
陷於塗炭苟存拯物不憚屈身故於首春特布新令赦其
殊死待以至誠使臣纔及於郊圻巨猾已聞其僭竊酷烈
滋甚吞噬無厭將相大臣咸懷憤激繼陳章疏固請討除
朕以所行天誅本去人害兵戈旣接玉石難分言念勲臣
橫遭脅制雖思改革厥路無由乃受污終身啣冤沒代淪

胥以逞誠可痛傷豈孽自一夫而毒流萬姓爲人父母寧不愧懷宜令諸道節度使將欲進軍先加曉諭王師致討唯止元凶所有脅從一切勿問如能去逆效順因事建功明設科條以示褒勸

權停來年郊廟詔

朕一經播遷久曠禮儀不唯霜露之感實貽失墜之憂賴先澤在人上帝臨我克平大難載復舊京方欲展禮郊丘請罪宗廟而乃股肱卿士詢謀異同明孝敬之大端陳古今之正義三省章表深體乃誠以義制心允從衆請予之

不德愧歎良深其來年告謝郊廟百寮請俟後期者可之
其元日御含元殿準式

贈顏真卿司徒詔

君臣之義生錄其功沒厚其禮況才優任國忠至滅身朕
每興歎勞於寤寐故光祿大夫守太子太師上柱國魯郡
公顏真卿器質自天公忠傑出出入四朝堅貞一志屬賊
臣擾亂委以存諭拘脅累歲死而不撓稽其盛節實謂猶
生朕自貽斯禍慚悼靡及式崇嘉命兼延爾嗣可贈司徒
仍賻絹帛五百端米三百石男頽碩等至喪制終後所司

聞奏超授官秩

給百姓耕牛詔

諸道節度觀察使所進耕牛委京兆府勘責有地無牛百姓量其產業以所進牛均平給賜其有田五十畝已下人不在給限

許百姓開採瑟瑟詔

瑟瑟之寶中土所無今產於近甸實爲靈貺朕不飾器玩不尚珍奇嘗思返樸之風用明恭儉之節其出瑟瑟處任百姓求採不宜禁止

招撫河中將士詔

朔方及諸軍應在河中將士頃赴奉天濟朕危難皆是功臣懷光脅其妻孥脫身無路朕屬者下詔招諭官爵實封一切如舊雖獲於陣上亦無所傷嗷然此心無負忠義今馬燧渾瑊並諸軍勝捷相繼河中將校歸降頗衆皆奉國捐家足以見軍士之心興言感歎宜加優撫宜以馬燧渾瑊充招撫使棄逆歸順一切不問歸順將士仍別建營屋優給任用各盡其才所在誘諭務稱朕意

授韋執誼等官詔

朕祇膺祖宗之業猥臨億兆之上任大守重不敢康寧永懷萬事之統懼有所闕夕惕若厲中夜以興求賢審官期於致理而政化猶鬱太平未臻思得海內忠良竭誠規諫洎經術之士才略之臣以明教化以立武事惟茲三者政之大經慮巖穴之間尚多遺逸故科別條目廣延異能賢良方正能直言極諫韋執誼等達於理道甚用嘉之位以旌能宜升秩敘其第三等人委中書門下即超資與處分第四等人即優與處分第五等人即與處分嗟乎強學以待問進德以及時昔公孫宏猶聞十上失之正鵠必反諸

身凡爲多士宜各自勉

祀五方配帝不稱臣詔

郊祀之禮本於至誠制禮定名宜從事實五方配帝上古
哲王道濟蒸人禮著明祀論善計功則朕德不類統天御
極則朕位攸同而祝文稱臣以祭旣無益誠敬有黷等威
此豈朕禮祀聰明昭格上下之意前京兆府司錄參軍高
佩上疏其理精詳朕重變舊儀訪於卿士申明大義是用
釋然依從改正以敦至禮自今已後五方配帝祝文勿稱
臣餘禮如舊

賜百官錢詔

百辟卿士實惟股肱頃屬艱虞損家殉節累經寇難靡不困窮洎復上京薦遭歉歲官俸旣薄公田不收外虧導從之儀內懷凍餒之戚朝列尚爾蒸人何堪軫於深衷良用愧惻應文武常參官等宜共賜錢七萬貫委度支據班秩職事及所損職田多少量等級從今至明年四月以來隨月支給凡厥多士宜悉朕懷

歲歉罷朝賀詔

朕以眇身仰承列聖不能纂修先志以洽昇平馴致寇戎

屢興兵革上元降警蝗旱爲災年不順成人方歉食言念於此實用傷懷是以齋心別宮與人祈穀雖陽和在候而黔首無聊稱慶於予竊所不敢其來年正月一日朝賀宜罷

褒涇陽令韋滌詔

滌有禦災之術有字物之方人不流亡事皆辦集惟是一邑之內獨無愁怨之聲古之循良何以邁此可檢校工部員外郎兼本官賜緋魚袋並賜衣一襲絹一百匹馬一匹凡百君子各宜自勉

加恩被擒將士詔

李希烈負恩作亂刦脅平人朕念生靈無辜務欲息兵捨
罪累行赦令皆許自新言必再三事出誠素此朕含垢忍
恥屈法爲人之心天下所明知也希烈又固執凶圖驅脅
將士違我詔命犯我軍兵今月三日遣僞署申隨唐鄧四
州都知兵馬使杜文朝率馬步五千人入襄州北界山南
東道節度使樊澤勒兵馬與戰大破其徒斬級擒生盪除
略盡又於陣上生擒杜文朝及大將馬坦然等此皆朕德
不昭感教未敷行致使平人脅從逆命其帥有罪其人何

辜朕所以省表悼心感事增歎猶冀改過尚可息兵明稱
屈己之心式洽好生之義其陣上生擒將士馬坦然等七
百九十人宜令樊澤給衣服糧食並却放還并寫前後赦
文勅命宣示淮西將士等有能向化者準赦令一切不問
官爵如初其傷痍未盡復者並委醫療令其得所其陣上
所殺人宜差所繇官於側近埋瘞兼立碑記無使暴露鬱
吾春和其杜文朝身領全軍事得繇己不能歸順力屈就
擒待到日當有處分

拜風師兩師詔

風雨等師升爲中祀有烈祖成命況在風雨事切蒼生今雖無文朕當屈己再拜以申子育萬姓之意

命舉選人習開元禮詔

開元禮國家盛典列聖增修今則不列學官藏在書府使効官者昧於郊廟之儀治家者不達冠婚之義移風固本合正其源自今已後舉選人有能習開元禮者舉人同一經例選人不限選數許集但問大義一百條試策三道全通者超資與官義通七十條策通二道已上者放及第已下不在放限其有試官能通者亦依正員官例處分其明

經舉人有能習律一部以代爾雅者如帖義俱通於本色減兩選令即日與官其明法舉人有能兼習一經小帖義通者依明經例處分

增置金吾十六衛料錢糧課詔

左右金吾及十六衛將軍故事皆擇勲臣出鎮方隅入居侍從自天寶艱難之後衛兵雖然廢闕將軍品秩尤高此誠文武勲臣出入轉遷之地宜增祿秩以示優崇並宜加給料錢及隨身糧課仍舉故事置武班朝參其廊下食亦宜加給其十六衛各置上將軍一人秩從二品左右金吾

上將軍俸料次於六統軍支給欲求致理必藉兼才文武
遞遷不全限隔自今内外文武缺官於文武班中量才望
相參敘用仍依故事於本衛量置衛兵所司條件以聞

以吐蕃入寇避正殿詔

昔我皇祖光宅天下底綏四方修德以安邊悅近而來遠
朕嗣守丕構姑務息人頃以西蕃載申信約蓋欲惠康庶
士協靜封陞而戎狄無厭大棄明義入我河曲害我生靈
鹽夏兩州淪陷蕃醜哀此蒸庶家業流離去父母之邦捐
骨肉之愛繇朕薄德俾人罹殃興言疚懷若墜焚灼側身

惕慮豈敢遑寧所宜省躬深自咎戒今視朝避正殿十五日百僚奏事悉於延英處分庶答天譴用惕深衷咨爾三事大夫洎於百辟所宜一乃心力共弼予違式佇嘉謀克清寇患宣示中外使悉朕懷

三節賜宴賞錢詔

比者卿士內外朝夕公務今方隅無事蒸民小康其正月晦日三月三日九月九日三節日宜任文武百僚擇勝地追賞每節宰相常參官共賜錢五百貫文翰林學士一百貫文左右神威神策等十軍各賜五百貫金吾英武威遠

及諸衛將軍共賜二百貫客省奏事共賜一百貫委度支
每節前五日支付永爲常制

令常參官陳奏利害詔

蕃寇雖退疆理猶虞安邊之策必有良算各委常參官具
所見封進每坐日三四人陳奏利害

張茂宗尚公主詔

古稱俯就是謂通喪恩之所加禮亦有變銀青光祿大夫
前行光祿卿員外置同正員駙馬都尉張茂宗華胄恭仁
溫良美茂當申下嫁之命式寵舊勲之家頃屬待年俄聞

在疚以其倚門之訓且在遺言築館之期當從先近俾參
秩於環衛以承榮於湯沐可雲麾將軍起復左衛將軍員
外置同正員駙馬都尉

欽定全唐文卷五十二目錄

德宗 三

訪習天文厯算詔

任常參官遣子弟拜掃詔

贈張太空謚詔

命奏舉人材詔

放免積欠詔

改二月一日爲中和節詔

修葺寺觀詔

爲李懷光立後詔

明經舉人更習老子詔

令畫中宗以後功臣於凌煙閣詔

復張孝忠官爵詔

考選勲賢胄子禁假代詔

誅崔位詔

定章服詔

禁和市詔

免郭鋼妻孥連坐詔

宣慰河南河北詔

答好心表進經帙詔

答趙憬上審官六議詔

禁私家藏槍甲詔

黜于公異詔

罷九日宴會詔

遣使宣撫水災詔

城鹽州詔

令應選人習三禮詔

授狄博濟衛尉少卿詔

答李晟遺表手詔

考試冬薦官詔

朝臣薨卒給俸料賻贈詔

宣慰元誼等詔

貶郭煦等詔

誅李迺詔

欽定全唐文卷五十二

德宗 三

訪習天文厯算詔

南正北正司天地之職羲氏和氏統日月之官蓋所以幽
贊神明發揮厯象經百王而不易涉千古而無疑慎竈疊
跡於前甘石比肩於後莫不仰稽次舍俯察機祥克窮盈
縮之端備極陰陽之際朕臨御區宇多厯歲年睠彼清臺
罕聞其妙豈人不逮昔將求之未盡雖天道難知固以不
言示教而時君取戒寧可遐棄厥司宜令諸州及諸司訪

解占天文及厯算等人務取有景行審密者並以禮發遣
速送所司勿容隱漏

任常參官遣子弟拜掃詔

常參官比來請假東都拜掃多廢曠職事任遣子弟以申
情禮

贈張太空謚詔

夫至道無名強假名而崇道至真無謚必求謚以明真惟
其可稱實在全德故南嶽元陽宮道士張太空混元育粹
元之又元煉骨三清存神八景衡峯養德時近百年依罔

象以冥搜挾鴻濛而沖用棲遲浩氣太古真形頃在先皇
敷崇道妙望乎元鶴之駕錫以紫霓之裳我有輔臣格言
高躅永懷僊子恨不同時聊申嘉尚之情式降昭旌之命
策名表德庶永無窮可贈元和先生

命奏舉人材詔

中書門下常參官曾爲牧守理行有聞者具名聞奏與諸
薦守宰論政事知所任者具名封進應被舉官等令御史
臺及吏部檢校勘資次勿令踰越然後臨試處分仍永爲
常式

金史卷五十二
三
放免積欠詔

興至化者務積於人故欲薄斂長國家者以義爲利故使
以時朕撫臨區夏宵旰忘勞苟可以助化濟人常思大小
皆益近以中夏甫寧頗勤經費遂收諸道停減將士糧料
用叶權宜言念疲甿重茲供億其貞元四年已徵到及在
路者即依前送其在百姓腹內者並放免五年已後每年
合收一百萬八十八貫石亦宜放免委本道觀察使各具
當管州所放聞奏並曉示百姓

改二月一日爲中和節詔

四序嘉辰歷代增置漢崇上巳晉紀重陽或說禳除雖因
舊俗與衆共樂咸合當時朕以春方發生候及仲月勾萌
畢達天地和同俾其昭蘇宜助暢茂自今宜以二月一日
爲中和節以代正月晦日備三令節數內外官司休假一
日

修葺寺觀詔

釋道二教福利羣生館宇經行必資嚴潔自今州府寺觀
不得宿客居住屋宇破壞各隨事修葺

爲李懷光立後詔

懷舊念功仁之大也興滅繼絕義之宏也昔蔡叔圯族周公封其子於東土韓信干紀漢后爵其孥以弓高侯君集之不率景化我太宗存其嗣以主祀詳考先王之道洎乎烈祖之訓皆以刑佐德俾人嚮方則斧鉞之誅甲兵之伐蓋不得已而用也曩歲盜臣竊發國步多虞朕狩於近郊指期薄伐將振昆陽之旅以興涿鹿之功徵師未達於諸侯衛士且疲於七萃而李懷光三軍夙駕千里勤王上假雷霆之威下逐虎狼之衆議功方始守節靡終潛構禍胎拒違朝命棄同即異捨順效逆爲臣至此在法必誅猶示

綏懷庶其牽復而梟音益厲豨突莫遷大戮所加曾無噍類雖自貽伊戚與衆棄之而言念爾勞何嗟及矣以其前効猶在孤魂無歸懷之忼然是用懷軫予欲布陳大惠冀以化成保合太和期於刑措宜以懷光外孫燕八八賜姓李氏名承緒授左衛率府胄曹參軍承懷光之後仍賜錢一千貫任於懷光墓側置立莊園侍養懷光妻王氏并備四時享奠之禮嗚呼朕實不德臨於兆人泣辜宥罪素誠所志爾其保姓受氏宣力承家勉紹乃考之建國庸無若爾父之違王命

明經舉人更習老子詔

明經舉人所習爾雅多是草木鳥獸之名無益理道宜令習老子道德經以代爾雅其進士同大經例帖

令畫中宗以後功臣於凌煙閣詔

昔我烈祖乘乾坤之滌盪掃隋季之荒屯體元御極作人父母則有熊羆之士不二心之臣左右經綸參翊締構昭文德恢武功威不庭康不乂用端命於上帝俾懷柔於四方宇宙旣清日月旣正王業旣成泰階旣平乃圖厥容列於斯閣懋昭績效表式儀形一以無忘於夕朝一以永垂

於來裔君臣之義厚莫重焉貞元己巳歲秋九月我行西
宮瞻宏閣崇構見老臣遺像雖然肅然和敬在色想雲龍
之叶應感致業之艱難覩彼思今取類非遠且功與時並
才爲代生苟蘊其材遇其時尊主庇人何代不有在中宗
則桓彥範等著匡戴之績在元宗則劉幽求等申翼奉之
勲在肅宗代宗則郭子儀等掃殄氛祲今則李晟等保寧
朕躬咸盡力肆勤光復宗祏繼之前烈夫豈多謝闕而未
錄孰謂旌賢況念功紀德文祖所爲也在予曷其敢忘有
司宜敘年代先後各圖其像列於舊臣之次仍令皇太子

書朕是命紀於壁焉庶永播嘉庸昭示天下俾後之來者尚揖清顏知元勲之不朽

復張孝忠官爵詔

法令者國之典章藩岳者朕之屏翰封域旣列疆里有經必守信誠用永終始干紀難虧於常憲念功宜貸於新恩酌於厥中是有茲命義武節度易定觀察等使檢校司空平章事張孝忠受委旌鉞作鎮方夏頃興士旅擅入邊城朝命旣臨不遠而復有過能改此誠可嘉是畀左揆之授俾參論道之職懋昭來効勿替舊勲可檢校尚書左僕射

同平章事如故於戲君人執信臣人執忠忠信允叶邦家
乃又朕奉祖宗之法期於慎守託王公之上務以存誠畫
野分圻皆有定制踰憲章則彼此交惡保封疆則烝庶獲
安偃甲息人所存者大咨爾方岳宏宣永圖各守爾典欽
承王度勲賢列辟宜體至懷

考選勲賢胄子禁假代詔

本置兩館學士皆選勲賢胄子蓋欲令其講藝紹習家風
固非開此倖門墮紊典教且令式之內具有條章考試之
時理須精覈比聞此色倖冒頗深或假市門資或變易昭

穆殊虧教化之本但長澆漓之風未補者務取闕員已補者自然登第用廕既已乖實試藝又皆假人誘進之方豈當如此自今已後所司宜據式文考試定其升黜如有假代並準法處分

誅崔位詔

崔位素行無良已有容貸忝職州佐殊不知非尚蓄姦謀罪當極法且委王叔邕決重杖一頓處死

定章服詔

頃來賜衣文彩不常非制也朕今思之宜有定制節度使

宜以鵲銜綬帶取武毅以靖封內觀察使宜以鴈銜威儀取其行列有序牧人有威儀也

禁和市詔

百姓困窮弊繇奸吏政苟不擾人皆自安其司農寺供宮內及諸廚冬藏菜並委本寺自供其菜價仍委京兆尹約每年時價支付更不得配京兆府和市其諸陵守當夫宜委京兆府以價直送陵司令自雇召並不得差配百姓應寒食雜差配及樹柴修橋柴木選塲棘等便於戶稅錢內剋折不得更令和市天下諸州府應納義倉及諸色斛斗

二合耗外切宜禁斷仍委度支鹽鐵分巡院及出使郎官切加訪察

免郭鋼妻孥連坐詔

郭晞男鋼在法叛亡已上道者斬父母妻子皆有連坐朕以先尚父翼戴肆勤安固邦國不忍以子忘其先勞今並原之俾復其位其諸不坐皆釋放

宣慰河南河北詔

惠下恤人先王之政典視年制用有國之常規故有出公粟以賑困窮弛歲征以寬物力廼者諸道水災臨遣宣撫

省覽條奏載懷憫惻其州縣遭水漂損乏絕戶宜共賜三十萬石度支即與本道節度觀察使計度各隨所近支給委本使擇清幹官送米給州縣

答好心表進經帙詔

卿之表弟早悟大乘遠自西方來遊上國宣六根之奧義演雙樹之微言念以精誠所宜欽重是令翻譯俾用流行卿夙慕忠勤職司禁衛省覽表䟽具見乃懷所謝知

答趙憬上審官六議詔

朕端拱虛懷精求至理弼違獻可允屬台臣卿道著直方

識通今古思振淹滯以敘彝倫罄竭謀猷裁成議列志在裨贊實沃予衷克彰奉職之誠深得大臣之體再三省閱良多嘉重焉

禁私家藏槍甲詔

槍甲之屬不蓄私家令式有聞宜當遵守如聞京城士庶之家所藏器械宜令京兆府宣示俾納官司他如律令

黜于公異詔

前祠部員外郎于公異頃以才名升於省闈其少也爲父母之所不容宜其引慝在躬孝行不匱匿名跡於猷畝候

安否於門閭俾其親之過不彰庶其誠之至必感此閔子
騫王休徵所以著名於前古也而公異安於棄斥遊學遠
方忘其溫清之勤竟至存亡之隔爲人子者忍至是乎宜
放歸田里俾自循省其舉公異官尚書左丞盧邁宜奪俸
兩月

罷九日宴會詔

屬者春秋令節朝野多歡乃與公侯庶寮俾同宴賞今西
河吳楚連被水災悼於厥心實未寧息尚軫憂念豈遑偷
樂其九日宴會宜罷

遣使宣撫水災詔

王者欽若天道惠綏下人修己以導其和平推心以恤乎災患康時濟理何莫由斯朕以薄德託於人上勵精庶政思致雍熙而誠不動天政或多闕陰氣作沴暴雨薦臻自江淮而及於荆襄厯陳宋而施於河朔其間郡邑連有水災城郭多傷公私爲害損壞廬舍浸敗田苗或親戚漂淪或資產沈溺爲之父母所不忍聞興言疾疚良深愧憫夙夜祇畏悼於厥心是用寢不獲安食而忘味特加賑恤庶洽幽明宜令中書舍人奚陟往江陵府及襄郢復隨鄂申

光蔡等州左庶子姚齊梧往陳許宋亳潁徐泗濠等州祕書少監雷咸往恒冀德棣深趙等州京兆少尹韋武往揚楚廬壽滁潤蘇常湖等州宣撫應諸州百姓因水漂蕩家業湮損田苗交至乏絕不能自存者委宣撫使賑給沈溺死者各加賜物仍並以所在官中兩稅錢物地稅充給其溺死人所在官爲斂收埋葬用申惻隱以慰幽魂其田苗所損委宣撫使與觀察使刺史約所損多少速具聞奏於戲一夫不獲一物失所刑罰不中賦斂不均皆可以失陰陽之和致水旱之沴其州縣應有繫囚及獄訟久未決者

委所在長吏即與踈理務從寬簡俾伸冤滯貪官暴吏倚
法害公特加懲肅用明典憲災傷之後切在撫綏咨爾方
鎮之臣洎於守宰咸宜悉乃心力設法救人以恤凶災以
補傷敗庶令安集式副憂勤宣布朕懷使各知悉

城鹽州詔

設險守國易象垂文有備無患先王令典況修復舊制安
固封疆按甲息兵必在於此鹽州地當衝要遠介朔陞東
達銀夏西接靈武密邇延慶保捍王畿乃者城池失守制
備無據千里亭障烽燧不接三隅要害役戍其勤若非興

集師徒繕修壁壘設攻守之具務耕戰之方則封內多虞
諸華屢警由中及外皆靡寧居深惟永圖豈忘終食顧以
薄德至化未孚既不能復前古之封致四夷之守與其臨
事而重擾豈若先備而即安是用宏久遠之謀修五原之
壘使邊城有守中夏克寧不有暫勞孰能永逸宜令左右
神策軍及朔方河中絳邠寧慶兵馬副元帥渾瑊朔方靈
鹽豐夏綏銀節度都統杜希全邠寧節度使張獻甫左神
策行營節度使邢君牙夏綏銀節度使韓潭鄜坊丹延節
度使王栖曜振武麟勝節度使范希朝各於所部簡擇馬

步將士合三萬五千人同赴鹽州左神策將軍兼御史中丞張昌宜充右神策軍鹽州行營節度使權知鹽州刺史兼御史大夫杜彥光可鹽州刺史兼御史大夫應所板築及緣修城雜役等宜共取六千人充其餘將士皆列布營陣戒嚴設備明加斥候以警不虞其修城板築功役將士各賜絹布有差其鹽州防秋將士三年滿與代更加給賜仍委杜彥光具名聞奏悉與改轉其防遏將士等畢事便令放歸仍賜布帛有差其諸軍吏士都賜帛七千匹朕情非爲己志在靖人咨爾將相之臣忠良之士輸誠奉國陳

力忘勞克茂功勲永安疆場必集兵事實惟衆心各相率勵以副朕意

令應選人習三禮詔

王者設教勸學攸先生徒肄業執禮爲本故孔子曰不學禮無以立又曰安上治人莫善於禮然則禮者蓋務學之本立身之端居安之大猷致治之要道屬辭比事而不裁之以禮則亂䟽通知遠而不節之以禮則誣實百行之本源爲五經之戶牖雖聖人設教罔不會通而學者遵行宜有先後自頃有司定議計功記習不量教化淺深義理難

易遂使修傳學者例從冬集習禮經者獨授散官敦本勸人頗乖指要姑務宏獎以廣儒風自今以後明經習禮記及第者亦宜冬集如中經兼習周易若儀禮者量減一選應諸色人中習三禮者前資及出身人依科目例白身人依貢舉例每經問大義三十條試策三道仍令主司於朝官學官中簡選精通經術三五人聞奏主司與同試問質定通否義策全通爲上等轉加超獎大義每經通十五條已上策通兩道已上爲次等依資與官如先是員外試官者聽依正員例其習開元禮人問大義一百條試策三道

全通者爲上等大義通八十條已上策兩道已上爲次等
餘一切並準習三禮例處分其諸館學士願習三禮及開
元禮者並聽仍永爲常式

授狄博濟衛尉少卿詔

前利州刺史狄博濟惟乃曾祖梁文惠公啟佑天后定紹
復之策幽贊中興宜錫祚裔垂於無窮矧博濟郡人懷之
理有異等可衛尉少卿

答李晟遺表手詔

皇帝遣宮闈令第五守進致誠旨於故太尉兼中書令西

平郡王贈太師之靈曰天祚我邦是生才傑稟陰陽之粹
氣實山嶽之降靈宏濟患難保佑王室掃盪氛祲廓清上
京忠誠感於人神功業施於社稷匡時定亂實賴元勲洎
領上台克諧中外訐謨帝道叶贊皇猷常竭嘉言以匡不
逮情所親重義無閒然方期與國同休永爲邦翰比嬰疾
恙雖厯旬時日冀痊除重期相見弼予在位終致和平豈
圖藥餌無徵奄至薨逝喪我賢哲虧我股肱天不慙遺痛
惜何極嗚呼大厦方構旋失棟梁巨川未濟遂亡舟楫君
臣之義追慟益深循省遺章倍增感切卿一門裔緒朕必

終始保持況愿等弟兄承卿教訓朕之志意豈忘平生卿縱不言朕亦存信比者卿在之日却未見朕深心今卿與朕長乖方冀知朕誠志無以爲念發言涕零是用躬述數行貴寫所懷得盡臨紙遣使不能飾詞魂而有知當體朕意

考試冬薦官詔

冬薦官其令諸司尚書左右丞本司侍郎引於都堂訪以理術兼試時務狀考其通否及歷任考第事跡定爲二等並舉主名姓錄奏仍令御史一人監試如授官有課效尤

著及犯贓不任者仍委御史臺及觀察使聞奏以殿最舉使

朝臣薨卒給俸料賻贈詔

君臣之際義莫重焉每聞薨殂深用惻悼宜厚哀榮之禮以申終始之恩文武朝臣有薨卒者自今以後其月俸料宜合給仍更準本官一月俸料以爲賻贈若諸司三品以上官及尚書省四品官仍令有司舉舊令聞奏弔祭之禮務從優厚用稱朕懷

宣慰元誼等詔

元誼李文通等皆有勲庸久於戎旅頃者事因疑誤城守
經時自致危懼比獻章表請率師人願赴京西用申誠効
亦遣使宣慰待之如初俟至闕庭胡於任使而行李之際
士衆攜離雖非本圖情亦可恕且處之東夏鎮在西郊皆
我王事誠爲一體況田緒任兼將相寄重方州委之撫綏
必能加輯言念將士素著勤勞既有申明各宜安堵仍委
田緒切加存恤以副朕懷

貶郭煦等詔

先聖忌辰纔經敘慰戚里之內固在肅恭而乃遽從宴遊

飲酒作樂既乖禮法須有所懲前汾州長史郭煦宜於袁州安置前南鄭縣尉郭暄於柳州安置曹自慶配流永州其駙馬郭曖王士平仍令並歸私第

誅李迺詔

干紀挾邪罪在無捨立忠効節賞不踰時善惡之理明懲勸之義著李萬榮男迺包藏奸險違背君親悖慢朝章扇動軍旅縱其豺狼之性徇其梟獍之心迫脅使臣妄有希覬厭蠱其父謀害其兄名教之所不容臣子之所同棄而又恣爲不道虐及無辜伊婁說張仵劉叔向並是忠良橫

遭殺戮萬榮臥疾不能制止永言及此深用軫懷李迺稔惡貫盈宜正刑典其伊婁說等三人委中書門下即與追贈仍令與一子八品正員官應在汴州將士等志堅金石節厲冰霜叶奉邦家咸懷憤激不受熒惑問罪奸凶執縛軍中傳獻闕下勲庸特茂遐邇所知宜獎忠勞各加優賞並與進秩仍令董晉三日內具名銜聞奏仍共賜錢三十萬貫委董晉逐便取鹽鐵轉運使錢物分給宣武軍節度都虞候兼御史大夫鄧惟恭都押衙兼御史大夫杜皓大將王應鳳曹元偁楊燕奇劉惟清陳文朝陳沛張庭芬薛

文翰趙藏用李庭光宇文澹李國信並竭忠效誠績用昭著惟恭可檢校左散騎常侍依前兼御史大夫賜實封百二十戶一子七品正員官並賜物四百段杜皓英幹並可右散騎常侍依前兼御史大夫應鳳已下各加官賜貫庭芬同節度副使十將等二百六十五人並優與改官在城將士被李迺脅從邀逼制使者事不由己朕所深知並一切不問宋州刺史兼御史大夫劉逸準亳州刺史兼御史大夫食封五十戶許孝常潁州刺史兼御史大夫高五立等咸竭維城之節各懷奉國之心並可檢校右散騎常侍

各賜實封一百戶其本官並如故仍各賜物二百五十段
其三州將士等別賜錢十萬貫亦並委董晉準前逐便收
取鹽鐵轉運使錢物分給仍委董晉速具名聞奏當與甄
錄